

Negara2 Asean perlu tetapkan polisi harga gas

KUALA LUMPUR, Selasa — Menteri Tenaga, Telekom dan Pos Datuk Leo Moggie menyeru agensi-agensi gas di negara-negara Asean menyelaraskan satu polisi harga gas bersama demi mengelakkan timbulnya salah faham di atas segala aktiviti yang mereka jalankan.

Katanya, gas akan terus memainkan peranan penting dalam memberbagai-kan sumber tenaga. Oleh itu satu polisi mengenai harga perlu ditetapkan untuk faedah bersama.

Datuk Moggie berkata demikian ketika berucap merasmikan pembukaan 'Coloquim' Malaysia - Itali anjuran Ja-

watankuasa Tenaga Kebangsaan (MNEC - WEC) untuk persidangan Tenaga Sedunia di Wisma Peladang di sini hari ini.

Katanya, penggunaan tenaga di negara-negara membangun adalah rendah dibanding dengan negara-negara maju. Umpamanya, penggunaan tenaga per kapita di Malaysia hanya kira-kira lima tong minyak saja setahun, dibanding dengan Jepun, lebih 20 tong setahun dan Amerika Syarikat 60 tong setahun.

"Negara-negara membangun juga banyak bergantung kepada minyak sebagai keperluan tenaga dibanding dengan negara-negara maju.

"Umpamanya, di rantau Asean, hampir 90 peratus dari keperluan tenaga didapati daripada minyak dan 93 peratus dari sumber tenaga Malaysia diperolehi daripada minyak," tambahnya.

Katanya lagi, Malaysia masih merupakan pengeksport minyak dan ini harus dijadikan sebagai bonus dalam merancang dengan lebih sistematik untuk keperluan masa depan.

Beliau memberitahu, sekiranya kita tahu mengenai potensi tenaga hidro di negara ini, kemungkinan besar jumlah keperluan tenaga kita akan meningkat 60 peratus dibanding dengan empat peratus yang diperolehi kini.

Bagaimanapun, katanya, negara ini masih mempunyai beberapa projek hidro besar-besaran yang dirancang untuk pelaksanaan.

"Untuk melancarkan skim ini, satu rancangan penubuhan 22 projek mini hidro yang direka khas untuk memenuhi keperluan rancangan elektrik luar bandar akan disiapkan sebelum menjelang akhir tahun 1983," jelasnya lagi.

Mengenai LPG yang bakal diperkenalkan untuk kenderaan di negara ini, Datuk Moggie menjelaskan: "Negara kita sekarang sedang mendapatkan bantuan dari AGIP, sebuah badan cawangan ENI dalam membantu negara ini memperkenalkan pelincir minyak untuk kegunaan harian dan Petronas juga sedang berusaha memperkenalkan sistem 'pipe-in' LPG ke kawasan perumahannya yang akan dibina di Pasir Gudang."

Bahan asal dari Arkib
Negara Malaysia